

# Reglamento pa proteccion di consumidor lo mester drenta na vigor dia 1 di januari 2025

**Durante presentacion cu Parlamento di Aruba a ricibi recientemente tocante e progreso di ehe-cucion di e Landspakket, Sra. Maria Dijkhoff-Pita di DEACI a elabora riba diferente punto cardinal pa loke ta trata sector financiero.**

Un di e puntonan primordial ta e ministeriele regeling consumentenkrediet (reglamento ministerial tocante credito di consumo). Dijkhoff-Pita a splica cu e reglamento aki a ser pasa den Parlamento na 2022 y ta trece reglanan pa locual ta e credito tanto pa placa y productonan pa asina por beneficia e consumidor.

For di e reglamento aki tin un reglamento specifico cu mester sali cu ta pa determina e balornan maximo di e compensacion di credito. Esaki ta e porcentahe cu e negoshinan por cobra na e consumidor pa un credito na plazo.

El a indica cu nan a busca un experto pa conseha cual ta e porcentahe mas aceptabel, pero tin algun duda den algun parti di e conceptologia di esaki. Pa motibo di esaki a manda e concepto pa Directie Wetgeving pa haya conseho tocante si e manera di implementa e porcentahenan ta corecto. E intencion ta ainda cu desde 1 di januari 2025 e reglamento aki lo mester drenta na vigor.

Otro tema den e Landspakket ta e reforma economico. Dijkhoff a splica cu Aruba Fair Trade Authority (AFTA) a ser instala desde 1 di januari 2024 y nan ta encarga cu implementacion di e mededingingswet (ley di competencia). El a remarca cu desde principio e intencion tabata pa trece e consumentenbescherming verordening (reglamento di proteccion di consumidor) tambe bou di AFTA, locual aworaki ta den e fase final.

El a sigui splica ya caba tin e concepto di ley y memorie van toelichting di reglamento di proteccion di consumidor. A busca in un abogado legislativo pa haci esaki pa alivia un poco e presion cu tin na Directie Wetgeving. E concepto a bay Raad van Advies caba y aworaki ta cabando cu e verslag a causa di e preguntanan di Raad van Advies.



Mientrastanto AFTA den cuadro di su profesionalisacion, el agrega, mester traha riba e conocimiento. AFTA Aruba a haci un cooperacion cu ACM na Hulanda y Hulanda a manda tres asignacion.

Dijkhoff-Pita a indica cu un a yega caba dia 12 di september te cu 15 di december esey ta especificamente pa locual ta transferencia di conocimiento. Despues ta bin na januari un di dos asignacion di ACM cu ta pa crea e randvoorwaarden di e reglamento di proteccion di consumidor pasobra, el a sigui splica, e idea ta cu e reglamento pa locual ta e proteccion di consumidor lo drenta na vigor entrante 1 di januari 2025 y lo bin un experto di asignacion di ACM pa yuda den e training di e personal pa crea e voorwaarden. E di tres asignacion cu ta pa april di otro aña lo ta tocante e randvoorwaarden di comunicacion pa locual ta e medidanan general cu ta den e ley cu aworaki ainda no ta ser realisa pa AFTA.

Dijkhoff-Pita a menciona cu otro proyecto cu tin ta modernisacion di e Vestegingsverordening bedrijven (reglamento di establecimiento di negoshi). El a subraya cu economia no ta keda para, ta haci hopi cambio y un di e metanan di ministerio tabata pa agilisa e proceso di permisionan di negoshi, pero el a

indica cu esaki tambe tin cu bay den man cu un modernisacion di maneho cual a ser realisa, pero e ley mes ainda a keda un ley cu ta di añanan 70.

El a menciona cu e plan van aanpak aworaki a ser aproba dia 24 di september y aworaki ta buscando e abogado di legislacion pa haci enmienda di legislacion.

Como di tres proyecto Dijkhoff-Pita ta indica tin e vereenvoudiging openen van een bankrekening (simplificacion di e apertura di un cuenta di banco). E proyecto aki ta pa crea posibilidad pa tur hende na Aruba tin un cuenta basico. E legislacion di esaki, el a splica, a ser prepara pa Banco Central, a bay Raad van Advies y ta wardando riba e comentarionan di e ley aki pa e por sigui su caminda.

El a menciona cu tin tambe un investigacion cu a ser proponi door di Hulanda. Dijkhoff-Pita a sigui splica cu e investigacion aki a ser realisa na Corsou caba, ta bay inicia na Sint Maarten y na Aruba alrededor di tres cuarta parti di e investigacion ta cla. E investigacion ta ser realisa door di profesor Hosein di Trinidad & Tobago y e yama "A detailed look into the Economic Opportunities for the Economy of Aruba". El a menciona cu nan haya e prome concepto caba y e intencion ta cu pa

fin di december e rapport lo ta cla.

El a resalta cu e investigacion aki no solamente ta haci un analisis di e situacion economico di e ultimo 20 aña pero tambe ta bin cu proposicionnan tocante kico ta e rumbo, vision y kico ta e diferente area cu Aruba lo por enfoca riba dje.

Otro proyecto cardinal ta e seguridad di alimento. Dijkhoff-Pita a indica cu un di e sectornan primordial ta e sector di agricultura y aki tin un investigacion cu tambe a ser proponi. El a señala cu e recientemente e compania priva, Priva Greengrounds, cu a gana e destaho publico, a cuminsa cu e investigacion aki. E meta di e investigacion ta pa bin cu conseho- y recomendacionnan tocante cual ta e miho sistema pa bay na un green house di production agricola pero na un forma comercial.

Ademas ta bay duna recomendacionnan no solamente tocante cual ta e miho tecnologia, pero tambe tocante cual ta e miho productonan mirando e clima y circunstanianan na Aruba, pero tambe teniendo na cuenta e demanda cu tin na e isla. E rapport aki lo mester ta cla pa december di e aña aki tambe.

El a remarca cu e resultadonan di e rapport aki lo ta

accesibel pa comunidad y e agricultornan por dicidi si nan ta bay haci uso di un tecnologia specifico. Financiamiento tambe ta un parti cu ta traha riba dje, pero el a indica cu esey ta bin den e uitvoeringsagenda nobo.

El a resalta cu den cuadro di e uitvoeringsagenda nobo tambe tin algun proyecto cu a ser agrega na e uitvoeringsagenda cual a bin despues di diferente proceso largo.

E proyectonan aki ta consisti di varios elemento y un di nan ta e toegankelijker en aantrekkelijk ondernemingsklimaat voor locale ondernemers en investeerders (ambiente empresarial mas accesibel y atractivo pa empresario- y inversionistanan local). El a splica cu esey kiermen cu nan ta bay traha mas explicito riba con pa mehora e clima pa e comerciante- y inversionistanan.

Otro proyecto cu Dijkhoff-Pita a menciona tin di haber cu centro di Oranjestad y centro di San Nicolas. El a indica cu e centronan aki ta practicamente morto y e intencion ta pa aworaki bin cu un proyecto den e Landspakket cu ta pa trece bida atrobe den Oranjestad y San Nicolas, tanto pa biba como pa traha. El a splica cu a busca un experto cu lo yuda traha riba un plan di desaroyo economico especificamente pa e dos centro di ciudad aki.

El a sigui splica cu a base di e investigacion cu e compania Priva ta bay haci tocante e green house, den e agenda ta bin e resultado tocante mas seguridad di alimento y akinan, el a señala, tin diferente aspecto cu lo bin pa, entre otro, un agripark caminda e tecnologianan cu ta ser proponi por wordo getest como pilot y esaki lo bay den man di diferente argicultor cu lo tin e capacidad pa haci esaki.

Por ultimo Dijkhoff-Pita a resalta cu e idea ta tambe cu tur locual cu ta trata maneho economico mester ta basa riba data oficial. Den esaki NSS ta un parti importante di e proceso unda cu lo haya miho data y a traves di e data aki lo traha un maneho cu ta mas coherente y cu ta cumpli cu e carrying capacity di pais Aruba.